

■ TRIBUNA POLITICA

Ils roms «Mint» en schlantsch

DA MARTIN JÄGER,
CUSSEGLIER GUVERNATIV

Ils roms «Mint» èn matematica, informatica, ciencias naturalas e tecnica. Tut las studentas e tut ils students che termineschan cun success lur studi en quests roms gidan a cuvrir il basegn d'inschigner e d'inschigners sin il martgà da lavur. L'economia svizra ed en spezial l'economia grischuna rendan cun raschun gia daditg attent a la gronda mancanza d'inschigner e d'inschigners. Perquai ston las persunas responsablas da l'industria avair gi in zunt grond plashair cur che la Scuola politecnica federala (SPF) ha pudì communitgar dacurt ch'il dumber da studentas e da students en ils roms «Mint» saja s'augmentà l'onn 2011 per 6,9%. En cumparegliaziun cun l'onn 2000 importa l'augment schizunt passa 50%. Che questas studentas e quests students han pussaivladads professunalas excellentas mussa la quota d'actividad da gudogn da las absolventas e dals absolvents da la SPF in onn suenter ch'els han terminà lur studi. 97% èn entrads en ina piazza correspondent. Er en las scolas autas spezializadas s'augmenta actualmain il dumber da studentas e da students en ils differents secturs da l'inschigneria. Ma la mancanza existenta da spezialistas e da spezialists n'ha tuttina betg pudì



vegnir eliminada. In studi ch'è vegnì fatg l'onn 2008 per incumbensa dal Departament d'educaziun dal Grischun è vegnì a la conclusiun ch'i mancan en Svizra tranter 3000 e 6000 inschigner e d'inschigners. Tut quai ha per consequenza che adina dapli spezialistas e spezialists da l'exteriur lavuran en Svizra.

Resguardond ils returns economics globals ans stuain nus esser conscients ch'il basegn d'inschigner e d'inschigners en Svizra dependa fermamain da l'andament da la conjuntura mundiala. Novas plazzas da lavur resultan per regla en consequenza d'innovaziuns tecnicas. Nus essan pia dependents er en temps economicamain difficils d'inschigner e d'inschigners creativs. En quest connex mussan differentas retschertgas che quest potenzial creativ na vegn betg pir scuverì e sviluppà a la scola auta, mabain sa sviluppa gia «tranter la naschient-

tscha e la fin dal stgalim secundar I», pia essenzialmain durant il temp da la scola populara. Il Plan d'instrucziun 21, dal qual er il Grischun vegn a far part, resguarda quests interess sin il stgalim superiur cun il nov rom «natira e tecnica».

Las scolas e l'ambient famigliar pudessan dentant tuttavia crear anc meglras cundiziuns generalas per intermediar a noss giuvenils la natira e la tecnica. Lur interess per questa materia ston ils giuvenils dentant chattar sez. In exempel remartgabel è per mai en quest connex il project ch'intgins gimnasiasts da la Scuola chantunala grischuna han lantschà ord atgna iniziativa, independentamain dal manaschi da scola. Quests giuvenils han fundà il team Helveticrobot ed èn sa participads alternantamain a concurrenzas naziunalas ed internaziunalas. L'onn 2011 è il team Helveticrobot da la Scuola chantunala Cuir schizunt vegnì campion mundial al RoboCup Junior ad Istanbul. Quest exempel mussa che nossas scolas pon metter a disposiziun als giuvenils – en il rom da la scolaziun – ils instruments per la tecnica. Elavurar e sviluppar vinavant quai ch'els han emprendì è dentant ina chausa ch'els giuvenils iniziativa e creativs fan sez. E quai è bun uschia.